



20-03-2024

UPA 2024/99

### Naqqiut

Naqqiut 1.marts 2024-meersoq taarserpaa.

Naqqiummi pisortanut, namminersorlutik inuussutissarsiuteqartunut aammalu innuttaasunut kingunissat allangortinneqarput.

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Inatsisartunut aalajangigassatut siunnersuut Naalackersuisut peqquneqassasut inatsimmik pilersitseqqullugit, angajoqqaq/oqartussaassusermik tigummiartoq meeqqamut ataatsimik arlalinnilluunniit innarluuteqartumut imaluunniit arlalinnik innarluuteqartumut akissarsiatigut taarsiivigineqarnissamik, pineqartoq meeqqap innarluuteqarnerata malitsigisaanik sivikinnerusumik suliguni. Tamanna pissaaq meerarisaq angerlarsimaffimmi najugaqartoq qassinilluunniit ukioqaraluarpat.** (Inatsisartunut ilaasortaq Anna Wangenheim, Demokraatit)

### Tungavilersuut

Meerarpassuit ullumikkut ataatsimik arlalinnilluunniit innarluuteqarlutik inuupput. Timikkut tarnikkullu innarluutit piujuarsimapput, kisiannili inuiaqatigiittut suli unammilligassarpassuaqarpugut inuit innarluutillit meeqqat atuarfiannut aammalu suliffeqarfinnut akuutinnissaannut. Pingaartuuvoq, annertuumik suliniuteqarnissarput inuit taakku tapersorsorneqarnerisa pitsanngorsarnissaannut.

Meeraq timikkut tarnikkulluunniit innarluutilik meeqqanit allanit tapersorsorneqarnissamik pisariaqartitsinerusarpoq. Uanili isumaqarluinnarpunga, pitsaanerpaamik tapersorsuisinnaasut tassaasut angajoqqaat imaluunniit ilaqtat qaniginerpaasat allat.

Tassunga atatillugu pingaartuuvoq aamma eqqarsaatigissallugu, angajoqqaat meeqqamut innarluutilimmut arlalippassuartigut nukitik tamaasa meeqqamut atortarmatigut, pitsaanerpaamik atuagaqartinniarlugit soorlu assersuutigalugu atuartitaaneranut. Taamaaliornerup kingunerisinnaalluarpaa, tamakkiisumik suliffimmik paarsisinnaanerup ajornakusoorsinnaanera. Angajoqqaat taakku ullumikkumiit annertunerusumik ikiorneqarlutillu tapersorsorneqarnerusariaqarput.

Meeqqamut inuusuttumulluunniit innarluutilimmut angajoqqaat amerlanerpaat annilaanganerinnarmi ilerasuuteqarnerinnarmillu inuuneqartarput, sulinermi nalaanni aasit atarfimmit, miniklubbimit imaluunniit allaniit sianerfigitinnissaminnut, aasit meerartik klassimi ajoqusersuisoq. Atuanngitsoorsimasoq. Atuaqatiminik qinngasaarisimasoq. Neriumanngitsoq. Oqalukkumanngitsoq. Anartarfiliarumanngitsoq. Arlaatigut unaminartoqartoq, angajoqqaallu "iliuuseqartariaqartut". Akuttunngitsunik aggersagaajuarneq oqaloqatiginnikkumasunik arlaannik pissuteqartunik.



Taakku saniatigut piffissaq, nakorsiarnernut, misissortinnernut, nassuiaatit takisuut, kommunemi sullissisunik ataatsimeeqateqarnerit, ulluunerani paaqqinnittarfinnik atuarfinnillu ataatsimeeqateqarnerit meeqqamut unammillernartut pillugit imaluunniit tapersorsorneqarnissamik pisariaqartitsineq meeqqamut tapersorsorteqarnissamik. Taanna akuersissutigineqareerpat, unammilligassat nutaat saqqummikkajuttarput. Tapersorsortit ilinniagaqanngikkajuttarput piffissamilu sivikitsuinnarmi atorfeqakkajullutik. Tamanna allanngorarnermik toqqissisimannginnermillu meeqqamut atugarlioreertumut kinguneqartarpoq. Tamanna tulluannigilaq ilinniarsimassutsikkut, perorsaariaassutsikkut peqqissutsikkullu.

Puigussanngilarpullu aamma inersimasoqarmat suli angajoqqaaminni najugaqartunik. Ilaqutariit ingerlalluartut, angerlarsimaffiminniitissallugit toqqaasimasunik, angerlarsimaffiup avataanut inissineqarnissaat tulluannigimmat qajassuutassat immikkut illuinnartut peqqutaallutik, angajoqqaat inummut pitsaanerpaq anguniarlugu. Uani eqqarsaatigaara, taakku meeqqat inersimasut inatsisitigut inersimasuummata, innarluuteqarnerat peqqutaalluni meeqqatut ukiukitsutut nalilerneqarsimasut.

Kingunissaa ersarippoq; angajoqqaat nukissaaruttut.

Uuminnga siunnersuuteqarnikkut ilaatigut pinaveersaartikkusuppara, angajoqqaat nukissaarullutik napparsimalernissaat. Meeqqat angajoqqaatik pisariaqartippaat, nalunngilluinnarmatik. Tapersersuisunik amigaateqarneq aammalu inuiaqatigiinni suliffeqarfinnilu akuersaannginnerup kinguneraa, ilaqutariit meerartallit amerlasuut nunanut allanut nuuttarnerat, ikiorneqarumallutik aammalu meeqqat siunissaannut innarliisussaanngitsumut.

Tamanna tunngavigalugu isumaqarpunga, qulakkeertariaqaripput, angajoqqaat meeqqanut innarluutilinnut, ulluinnarni annertuumik unammilligassaqartut, isumakuluusersoqqinnginneqarnissaat isertitaminnik annaasaqarnikkut, ilaqutariit inuuniarnerannut innarliisinnaasunut.

Demokraatit uangalu neriutigaarput, Inatsisartut siunnersuutip massuma pisariaqartinneqarnera takusinnaassagaat, pitsaasumik tapersiisinnaanerput, angajoqqaat innarluutilinnik meerallit akissarsiaminnik taarsiiffigineqalersinnaanerannut, sivikinnerusumik sulinissaq kissaatigisimappassuk meerartik innarluutilik tapersorsorumallugu oqilisaaffigiumallugulu. Isumanarpunga, inuiaqatigiinnut, angajoqqaanut minnerunngitsumillu pingaartumik meeqqamut innarluutilimmut iluaqutaasussaasoq.

Neriuppunga maani Inatsisartuni partiinit ammalu Naalakkersuisunit siunnersuutiga annertuumik taperserneqassasoq.

### **Pisortanut aningaasaqarnikkut allaffissornikkullu kingunerisassai**

Aningaasatigut allaffissornikkullu kingunerisassaasa akissutisinissai § 37-kkut apeqquteqarnikkut 025-2024 Naalakkersuisunut 2. februar 2024 nassiunneqarput. Naalakkersuisut ajoraluartumik naammaginartumik akinngillat, taamaattorli SIK akissarsiaasa minnerpaaffissaat kisimik nassuiarpaat.<sup>1</sup> Tamanna tunngavigalugu

---

<sup>1</sup> Akissut §37-apeqqut 025-2024



Naalakkersuisut imaluunniit Inatsisartuni ataatsimiitsitaliaq Aningaasatigut allaffissornikkullu kingunissat Inatsisartuni suliarineqarnerani misissussagaat.

**Namminersorlutik inuussutissarsiuteqartunut aningaasatigut allaffissornikkullu kingunerisassai**  
Soqanngilaq

**Innuttaasunut aningaasatigut allaffissornikkullu kingunerisassai**

Siunnersuut akuerineqarpat angajoqqaq/oqartussaassusermik tigummiartoq meeqqamut ataatsimik arlalinnilluunniit innarluuteqartumut imaluunniit arlalinnik innarluuteqartumut akissarsiatigut taarsiivigineqarnissamik, pineqartoq meeqqap innarluuteqarnerata malitsigisaanik sivikinnerusumik suliguni. Tamanna pissaaq meerrarisaq angerlarsimaffimmi najugaqartoq qassinilluunniit ukioqaraluarpat.